



QUÆSTIO MEDICA,
QUODLIBETARIIS DISPUTATIONIBUS
MANE DISCUTIENDA
IN SCHOLIS MEDICORUM.

Die Jovis vigesimâ secundâ Novembris.

M. DIONYSIO DODART, Sreniff.
D.D. Principis Dotariæ de Conty Medico,
Regiæ Scientiarum Academiæ Socio,

DOCTORE MEDICO,

PRÆSIDE.

An omnis morbus, à Coagulatione?

I.

CORPUS humanum, machina variis organis instructa, iners jaceret, nisi à fluidis motum suum mutuaretur. Sanum dicitur; dum varii ejus succi perpeti & expedito cursu per vasa feruntur, assiduo tritu commo-
hantur, ex iisque debita sit excernendorum secretio. Inter corporis liquores primas tenet Sanguis. Purpureo hocce liquore irrigantur omnes illius partes, sed certo ordine, determinatâque mensurâ. Cor, inter organa præcipuum primumque mobi-
le, debitis & statis temporibus contractiones suas molitur. Singulis contractionibus, quandam sanguinis portionem è suis ventriculis ad totum corpus propellit. In
statu sano, dum nempe fluxilior est sanguis, dum expedit ac patentes sunt viæ, sanguinæ molis resistentia cordis nisu facillè superatur, & tota sanguinis portio
ventriculis contenta singulis pulsationibus ejicitur. Si verò sanguinis circuitus per
corporis partes, vel ob angustiores vias, vel ob ejus lentorem retardetur; atque
adeò ea sit sanguinæ molis resistentia, quam unica cordis pulsatio vincere non
possit: tunc non omnis sanguis ventriculis contentus in arterias protrudetur. Cum
tamen necessariò certam sanguinis quantitatem, statis temporis intervallis, cor ad
partes propellere debeat: quò magis ejus impetus à sanguinis resistentiâ superabi-

tur, eò crebriores molietur contrações. Ex vario in variis hominibus inter singulas contrações temporis spatio, variâque sanguinis fluxilitate, & majori vel minori solidarum partium resistentiâ, exurgit pulsuum varietas, non tantum in statu morbo, sed & in sano. Ex eodem quoque fonte derivantur temperamentorum differentię : Quibus fluxilior est sanguis, validius cor contrahitur, citiusque adimplentur ac exhauriuntur ventriculi, & absolvitur circulatio ; hi Calidiores dicuntur : Frigidiores verò, quibus lentior est moles sanguinea, debilius & longioribus intervallis cor contrahitur, tardiùsque peragitur circulatio. Præcipua è sanguine secretio, nervorum liquidum, cujus in partes influxus per membranarum cerebri constrictionem promovetur. Illo continuo madent nervi ; sed plùs minùsve ipso turgent, prout validius debiliùsve constringitur cerebrum, eorum origo : unde vividius languidiùsve peraguntur in corpore sensationes & motiones. Variâ præterea liquores variis apti functionibus è sanguine secernuntur. Horum quidam extra corpus excernuntur ; quidam vero jugi circuitu ad massam sanguineam reflunt. Nulla succorum secretio absque sanguinis tritu. Sales enim sulphuraque, quibus tota constat sanguinea moles, spontè in varia concreta facessunt, nisi assidue & accurate per totum corporis habitum eorum moleculæ dividantur ; quæ, pro variâ, quam inde sortiuntur, tenuitate, varia subeunt incernicula, arque adeò varios constituunt succos. Nimis tamen attenuata sanguinis cæterorumque fluidorum moleculæ, ob salia tunc nimis evecta & jam à sulphuribus ferè expedita, acriores redduntur ; nisi ritè excernantur, sanitatem lædunt. Triplicis sunt generis excretiones : uberrima una per cutis poros, altera mediocris per urinarius meatus, tertia modica per alvum. Hæc ultimâ viâ, bilis & pancreatis glandularumque intestinalium succi, cum crassioribus alimentorum particulis, evacuantur. Per urinarios ductus fluunt urinae, sive quæ citò ventriculi vesicæque membranas trahiciunt, sive quæ cum sanguine circumactæ, & ipsius fœtæ salibus, renum colatoria pervadunt. Insensibilis perspirationis materia vel per cutanearum glandularum excretorios ductus ejicitur, vel per totius cutis & cæterarum membranarum poros. Si tardior sit & rarior, tentis auræ instar exhalat ; si verò uberior & crassior, sensibilis fit & Sudor dicitur. In vegetâ sanitate insensibilis perspiratio est aliarum excretionum summæ circiter dupla, & excretionis per alvum duodecupla : habitâ tamen ratione variæ cœli corporumque temperiei. Excretorum quantitas assumptorum ciborum quantitati par esse debet. Excernantur ergò inutiles noxiæque succi, utiles assidue conterantur, libero cursu fluant : vigebit sanitas. Secus : omnis morborum cohors misero incubabit corpori.

I I.

QUEMADMODUM ex succorum motu per vasa, Vita ; & ab illius æquabilitate, Sanitas : sic ex ejusdem motus imminutione, Morbus ; & ab omni prorsus cessatione, Mors. Mortalium quisque ineluctabili fato abripitur, sed nullus sine morbo. Morbus via est ad mortem, quæ nonnunquam adeò præceps est, ut ferè in instanti à statu sano ad mortem ducat. Sæpius tardiori gressu homines aggreditur letum, dum scilicet naturali morbo, nempe senectute, paulatim ad hunc usque terminum perducuntur. Sæpiissimè naturalis ille terminus variis ægritudinibus acceleratur, prout variè à diversis causis externis afficitur homo, nisi salutari manu ad sanitatem restituitur ; quod quidem Medici munus est. Sanguis, ut præcipuum corporis fluidum, sic plerorumque morborum fons est & scaturigo ; nec ferè unquam à quâlibet cæterorum succorum alteratione illæsus evadit. Hujusce fluidi morbus, Febris : quæ quidem multiformis. Omnes tamen

cujuscunque generis sint, intermittentes aut continuæ, malignæ vel benignæ, ex accelerato præter naturam pulsu faciliè innotescunt. Errant, qui aut immodicæ sanguinis effervescentiæ, aut adauctæ & accelerate sanguinis circulationi, pulsus celeritatem tribuunt. Quò tardius vel difficilius fluit sanguis per vasa, eo crebriores redeunt cordis & arteriarum pulsationes. Hanc sanguini moram infert vel torius massæ lentor, vel quarundam ipsius partium in vasis minimis inharrentium inspissatio. Acceleratum pulsum frigus vel æstus comitantur: frigus, si tota sanguinea moles in majoribus vasis hæreat; æstus, si in tenuioribus tantum vasis inhibeatur ejus motus progressivus, dum intra majora ferè totâ suâ fluiditate donatur. Sanguinis cursum imminutum sequuntur cætera febriuni symptomata: suppressæ secretiones, unde sitis, oris & faucium siccitas, ariditas cutis: spirandi difficultas, retardato nempe sanguinis per pulmones cursu: tremor, ex præpedito succi nervosi in nervos influxu: sudor, cum fluidâ sanguinis parte nimis compressâ, ejus serum per cutis poros exprimitur. Si ad obstructos tenuissimos canales jugiter affluat sanguis, oriuntur partis inflammatio & tumor, doloris sensus, nonnunquam motus convulsivi, deliria, aliquando vasorum sanguineorum disruptio & hæmorrhagiæ, sæpe etiam cæterorum vasorum erosio, sanguinis & succi membranarum effusio, in partibus stagnatio, putrefactio, ac proinde abscessus & ulcus, vel etiam identidem partis corruptio & sideratio. Pustulæ, phlyctenæ, variolæ, morbilli sunt quoque varia hærentis sanguinis in febre symptomata. Præter has sanguinis affectiones, suas quoque peculiare alterationes patiuntur cæteri corporis humani succi. Si nervorum liquor intra suas fistulosas fibras immoretur, non amplius affluit ad partes, ac proinde intercipitur partium motus, sensus, & nutritio; unde paralyticæ dicuntur. Cum è sanguine minori copiâ secernitur, & segnius fluit per vasa, ad fibras nervosas distendendas impar est: idcirco languidiore evadunt corporis functiones; hinc virium prostratio, somnus & affectus soporosi. Cum per succus tantum ad partes appellitur, tremores excitat & spasmodicos motus. Si diutius in nervosis fibris stagnet, nec liberè ex illis effluat, has continuò distensas tenet, unde partis convulsio & rigor immobilis. Nonnunquam etiam, inflammatis aut irritatis cerebri alteriusve partis membranis, inordinatè propellitur ille succus ad varias cerebri partes: hinc delirium, mania, phrænitis, aliiq; affectus hujuscemodi; qui non tam succi nervosi sunt vitia, quam sanguinis cæterorumque succorum. Lympha variis quoque morbis obnoxia est pro diversis quas alluit partibus. Vel intra sua vasa & receptacula stagnat, & varios gignit tumores: intra tendines & ligamenta, ganglion: circa collum, strumas & bronchocelen: in aliis partibus glandulas, tubercula, & tophos. Vel extra sua vasa diffunditur, & alios tumores generat: ex fibris membranaceis, pustulas, & abscessus varios: ex lymphaticis ductibus, tumores œdematosos, hydropem aut universalem aut peculiarem. Vel lentè exsudat ex patentioribus fibrarum poris, & in varia tubera immutatur, quæ vel carnes simulant, ut sarcoma, sarcocele, polypus, epulis: vel ad tendinum naturam accedunt, ut condyloma, callus, verrucæ, clavi: vel ossæm effingunt substantiam, ut exostoses, nodi. Mucosarum glandularum lympha, in suis glandulis coërcita, catarrhos exhibet: in musculorum membranas diffusa, & crassior illis inharrens, rheumatismum: in ligamentorum ac tendinum sinibus vel articulationum interstitiis stagnans, arthritidem. Bilis sicut cæterorum corporis fluidorum motus intercipi potest: vel tardè fluit ad intestina, hinc alvi pigrities, nonnunquam etiam lienteria, & alvi fluxus: vel à crassiori bile obstructis ductibus biliaris, per vasa lymphatica refluit ejus

fluidior pars; & iterum efficit: vel per vasa sanguinea, & ab eâ febres continuæ ardentes, ephelides, erysipelata, alique morbi biliosi ortum ducunt: vel cum sanguine in venis mesentericis & hæmorrhoidalibus stagnat, hinc hæmorrhoidum cruciatus, fluxus, &c. vel tandem discussi biliarium ductuum obstructionibus, ad viscera ubertim affluit; hinc biliosi fluxus, cholera, dysenteria, alique similes affectus. Uno verbo, ex horum cæterorumque succorum stagnatione aut morâ, innumeri grassantur partium organicarum morbi, mirâ inter se varietate distincti.

III.

MORBUS unus & idem in omnibus: motus imminutio. Unicam pariter causam arguit: succorum inspissationem. Varias tamen species induunt morbi; nam pro vario inspissationis gradu, pro variâ succorum inspissatorum indole, pro variis partibus in quibus inspissantur, variæ corporis functiones diversimodè lædi possunt. Triplicem inspissationis cum sanguinis, tum cæterorum corporis succorum causam agnoscimus: tritus defectum: partium nimis evolutarum & excernendarum in corpore coercitionem: & partium corporis liquores coagulantium immissionem. Tritus duplici potissimum instrumento peragitur: Respiratione, quâ sanguis indefinenter in pulmonibus arteritur; Exercitatione, quâ intra musculosas fibras alteram subit commolitionem. Sublatâ respiratione, crassiores sanguinis moleculæ tenuissima pulmonum vasa permeare nequeunt; unde fiunt per totam pulmonum substantiam obstructiones, quas brevi excipiunt interrupta sanguinis circuitio, animalis suffocatio & interitus. Exercitationis defectu non tam citò læditur sanitas, quippe liquorum motus non statim cessat; sed paulatim lenti & glutinosi fiunt corporis succi: in quibusdam ex tenuioribus tubulis hærent eorum moleculæ crassiores, densioresque in illis generantur obstructiones. Hujus inspissationis ratio est, Nexus facilis molecularum sanguinis cæterorumque corporis nostri liquorum. Cum enim ex salibus & oleis potissimum consistant, Chymicorum concreta resinosa, sebacea, saponacea, vel gelatinosa æmulantur: quorum partes, dum leni calore foveantur, fluidæ sunt; spissescunt verò, cum primum ab igne removentur. Altera liquorum densationis causa, Sales Acidi vel Acres iisdem admisti. Sanguis quippe ad oleosorum naturam accedens à salibus tum acidis tum acerbis diversimodè coagulatur, sive tota ejus massa, sive quædam ipsius portio. Sanguinis serum ab affusis acidis Chymicorum liquoribus in densum & caseosum coagulum: ab acerbis fixis in minus spissum concrevit: ab utinosis aut totum in gelatinam compingitur, aut quædam ipsius portio leviter coagulata deprimitur. Ex duplici fonte scaturiunt illi sales: vel in sanguine per iteratas commolitiones evolvuntur, & in illo, interclusis excretionibus, redundant: vel extrinsecus advenientes per alimentorum ductus, aut aliam quæcumque viam, corporis liquores subeunt, isque permiscuntur. Ex succis, quibus irrigatur corpus humanum, solus chylus acescere potis est: si præsertim alimenta ex quibus conficitur, ex vegetantium familiâ desumantur, quæ salibus acidis turgent. Sanguis cæterique ex eo nati liquores stagnatione nunquam accescunt, sed acrimoniam summam contrahunt, ut experiri licet in sanguine, sero, bile, salivâ, & urinâ fermentescentibus aut putrescentibus. Si igitur quæcumque de causâ cujusdam ex insignioribus mesenterii glandulis canalis excretorius obstruatur, in glandulâ immoratur chylus & acescit. Cum autem ad certum aciditatis gradum pervenit, coagula dissolvit: mole disruptâ, rapido cursu ad massam usque sanguineam pervenit, quam inspissat, & omnia intermittensium februm, vel quarum paroxysmi à frigore incipiunt, symptomata concitat. Harum

5
 rigor à totius massæ sanguineæ in majoribus vasis concretionem excitatur, quâ non solum sanguinis motus progressivus, sed & intestinus, in quo positus est calor, multum imminuitur. Astus verò rigorem sequitur, ob redditam, crebris cordis concussibus, sanguini majoribus in vasis fluiditatem; crassioribus interea moleculis intra tenues canaliculos pertinacius hærentibus. Calorem præter naturam adaugent, impetus totius massæ sanguineæ à corde in partes solidas propulsæ, quo solito validius ac frequentius concussæ magis incalescunt; impetus quoque insensibilem sanguinis partium undequaque agitarum, & in vasorum parietes irrudentium, qui quidem valentior est, dum stagnat sanguineus latex, aut tardius quàm in statu sano progreditur. Post stata tempora febriles redeunt paroxysmi; si nempe ab acido in glandulâ superstitè succedens lymphæ statim coaguletur: novam enim pariet obstructionem, quâ novo advenienti chylo transitus per glandulam denegabitur; & eò citius tardiusve recurrent paroxysmi, quò celerius lentiùsve accescet chylus. Si una tantum intercludatur glandula, unus erit febris fomes, & simplex febris; multiplex verò, si plures obstruantur glandulæ. Nec solummodo febres intermittentes, sed varia quoque variis in affectibus symptomata gignit accescens chylus; quorum tamen causa primaria non est. Sic in scorbutò densiora coagula creat in mesenterii glandulis: in melancholicis & hypochondriacis affectibus, effervescentias in intestinis producit: in cachexiâ muliebri pravorum ciborum appetentiam excitat; & jam inspissatos liquores ita compingit, ut postea vix solvi queant coagula. Hæc quidem ab Acido; sed ab Acri exuperante & nimis evoluto plura & longè graviora impendunt.

I V.

IN omnibus corporis humani liquoribus redundant sales acres: in sanguine cæteris principiis accuratè involuti: in nervorum succo tenuiores & tenui cum sulphure confociati: in bile crassiores uberrimi & cum crassiori sulphureâ substantiâ permixti: in urinâ sudore & perspirabili materiâ tenues & crassi simul confusi, & à sulphureo involucro magis extricati. Hæc patent ex acri sale qui per analysin ex his succis uberrimè elicitur. Penetrante eorundem succorum putrescentium odore magna acrium volatilium salium copia iis inesse comprobatur; quod etiam concludere licet ex viridi colore, quem violarum tincturæ conciliant iidem succi. Acres illi sales in sanguinem & corporis humani liquores per alimenta invehuntur. Iis namque turgent cibi ex animalibus desumpti. Qui verò occurrunt acidi salive sales in aliis cibis, partibus oleosis obducti & terreis moleculis irriteriti, in acres citò convertuntur. Horum salium copiosior affluxus, vel eorundem assiduo tritu nimis evolutorum in sanguine redundantia, inceptis nempe excretionibus, ingratam morborum catervam secum trahit. Acres enim sales cum sulphureis sanguinis particulis statim coadunantur, & in grumos coalescunt. Hinc inæqualis sanguinis crasis, & inæqualis motus. Qui in fluidiori sanguinis parte innatabant grumi, è majoribus vasis in tenuiora protruduntur. Si densiores sint, soluti difficiles pariunt obstructiones: leves verò, si minus densi. Si in quamplurimis tenuissimis canalibus obstructis sanguini transitus intercludatur, febres continuæ ardentes accenduntur. Sæpius ipsarum fomes est Bilis, quæ, aliis imminutis excretionibus, uberior & acrior è sanguine separatur, nec citè in intestina excernitur. Hæc in sanguineum laticem irruens illius partem sulphuream in grumos agglomerat, quorum crassissimi in tenuiores cerebri, pectoris, vel abdominis tubulos protrusi, membranas distendendo vel irritando, dolores & inflammationes ibi pariunt. Ex bilis in sanguinem irruptione mox suppressâ, mox quoque restitutâ oriuntur Exa-

exacerbationes. Nam sanguis ab irrupente bile spissescens exacerbationem excitat :
 spisso sanguine , desinit bilis secretio , ac proinde ejus in sanguinem irruptio : inte-
 rim fluiditate ab iteratis cordis ictibus sanguini redditâ , remittitur exacerbatio ;
 donec restitutâ bilis secretionem , ejus in sanguinem influxus novos astus accendat.
 Febrium putridarum & pestilentium malitia ab acrium salium vel uberrimâ copiâ ,
 vel summâ tenuitate pendet. Cum uberiores sunt , maximam tenuiorum canalium
 partem innumeris , quos pariunt , grumis ocludunt. Cum autem tenuiores ; in exi-
 guissimos irrepunt corporis canales , ibique vix solubiles obstrukciones ingenerant.
 Hinc tot ac tanta tamque gravia putridarum & pestilentium febrium sympto-
 mata : sanguinis resolutio ; quam letales sequuntur hæmorrhagiæ : succi nervosi
 penuria ; & ex eâ pulsûs intermissio , lipothymia & syncope : tenuiorum tubulo-
 rum obstrukciones ; quas comitantur sanguinis stagnatio , exanthemata , &
 carbunculi : membranarum irritatio ; ex quâ inflammationes , motus convulsivi ,
 deliria : partium erosio ; unde pustula variæ & bubones. Luis venereæ sympto-
 mata attentè pendenti , lymphatici succi coagulationes , dolores lancinantes ,
 partium erosionem ab acribus salibus oriri liquidò constabit. quòd si ullum fortè
 supersit dubium ; hoc morbo infectorum lympham examini subjiciat , & omnia
 liquoris alcalini signa in eâ deprehendet. Undenam in scorbuto , in affectibus me-
 lancholicis & hysteriis desumi potest liquorum lentor , nisi à succo salibus acribus
 referto ? Stupenda ossium flexilis mollitia , quæ summum est scorbuti molimen ,
 nonnisi ab acida dissolventi produci potest ; cum acida rigiditatem potius conferant ,
 ut variis constat experimentis. gingivarum corrosio effectus est acridinis causti-
 citative , quæ in ejusmodi agrotantium salivâ variis tentaminibus manifesta sit.
 Gignuntur quoque affectus melancholici & hypochondriaci à salinis acribus par-
 ticulis , quæ , interceptis excretionibus , varios corporis succos , tum denique ner-
 vorum liquidum pravè afficiunt. Idem de hysteriis affectibus asserendum. Qui
 his in morbis , succus acidus in ventriculo aut in intestinis deprehenditur , is non
 tam hujusce morbi causâ , quàm symptoma censendum est. Ex depravato ventri-
 culi succo oritur , quo vitato alimentorum salia non accuratè involvuntur : si
 igitur ex vegetabilibus desumpta fuerint , in succos acidos immutantur : si verò
 ex animalium familiâ , putrescunt & in succos acres ac fædum nidorem emitten-
 tes convertuntur. Reverà chylus , cujus sales vel acidi vel acres sui juris evaserè ,
 novas succis noxas infert , & graviora symptomata pejora prioribus excitat. Qui
 in Phthisicis acidum succum pulmones corrodentem incusat , ad ipsorum puru-
 lenta ferentiaque sputa attendat : nihil acidi in illis adverteret , sed salem acrem ,
 qui cæruleam violarum tincturam in viridem mutat. Arthriticorum tophorum cre-
 tacea substantia certissimum est argumentum , aliunde reperti non debere princi-
 pium mucosam lympham in articulis coagulans , quàm ab alcalino sale : fer-
 mentescit enim cum liquoribus acidis gypsea illa materies , & cæteras acris salis
 notas præbet. Accessus Epileptici à succo quâdam in parte stagnante & pu-
 trescente , qui , cum ad certum acridinis gradum pervenit , nervosas membrana-
 rum fibras adeò vellicat , ut omne nervosum genus in contractionem adducat.
 Cum verò , per varias partis contractiones , in massam sanguineam propulsa fue-
 rit putulenta illa materies , ex nimîâ sanguinis & succi nervosi inspissatione
 languent omnes corporis functiones , donec aut omnino involutum , aut forâs
 amandatum fuerit illud coagulationis principium. Congestus iterum in eodem
 sinu acrior ille succus novum suscitabit paroxysmum. Cæterorum morborum
 causas evolventi , nihil aliud præter sal acre culpandum erit.

QUÆ, sublata vel imminuta succorum fluiditate, nascuntur in humano corpore incommoda, eadem restituta, evanescent. Triplici modo restitui potest, aucto nempe succorum tritu, instituta ac provocata lædenti humoris excretionem, & eorum, quæ coagula solvere valent adventu. Hos fines Therapeutice variis, quæ salubriter adhibet, remediis consequitur. Inter omnia primas tenet sanguinis missio. Cæterarum excretionum vicem supplet hæc evacuatio, exuperantium in corpore liquorum redundantiam tollit, fibræ vasorum ultra metas distensis tonum restituit, debitumque succorum tritum promovet. Qui lucro potius quam ægrorum saluti consulens vanâ spe eludit; illudque præstantissimum spernit javamen, ex sanguinis per disrupta vasa eruptione, sed tardiori, quàm graviter peccaverit, naturâ indigitante, cognoscer. Sed cave, ne sæpius iteratâ sanguinis eductione adeo exhauriatur massa sanguinea, ut debitæ secretionis imminuantur, ac præsertim in cerebro; tunc enim nervosi succi penuriâ corporis functiones debilitantur, cor & arteriæ languidiis feriunt, quàm ut densiora in tenuibus vasis coagula comminueret, ac in majora vasa propellere valeant. Salubrius adhibetur incunte morbo, quæ seriùs post aliquot dies institueretur, cum majorem densitatem essent adeptæ coagulata partes. Alterum Therapeutices præsidium ex stimulantibus desumitur. Stimulus est impetus, quo nervorum fibræ percussæ varias vibrationes patiuntur. Quandoque ita vividus est, ut à se invicem dimoveantur fibræ, & nonnunquam disrumpantur; aliquando verò ita debilis, ut vix earum concussus percipiantur. Stimulantium effectus, est majorem nimum validioremque contractionem in fibris excitare, vividiorum ideo cujuscunque liquidi corporis tritum ac expressionem promovere, ejusdemque motum ciere. Rarò occurrunt medicamina simpliciter stimulantia, sed ferè omnia, sive internè sive externè adhibeantur, partes quasdam in corporis succos inducunt, quibus illos alterare valent. Inter ea prima se se offerunt sursùm deorsùmve purgantia medicamina. Emetica non solum ventriculi membranas irritando, ejus glandulas exprimunt, sed etiam in convulsionem contrahunt diaphragma & abdominis musculos, quâ compressio ventriculo, contenti liquores sursùm per œsophagum propelluntur. A Catharticis intestinorum & totius abdominis membranæ convelluntur, & in earum glandulis inherentes succi validè excutuntur. Quinetiam iis stimulis afficiuntur nervi, augeturque per omne corpus succorum commotio: hinc sæpe non modo sursum atque deorsum noxii evacuantur humores, sed & per salivam, urinas, sudores totum corpus diluit; & eò magis, quòd particulas tenues secum vehunt evacuantia, quæ varios menterii tubulos subeundo, inspissatos succos attenuant, & coagula solvunt. Diuretica, Sudorifera, Diaphoretica, Salivantia, cæteraque peculiaria evacuantia stimulando potissimum suum effectum sortiuntur. Nam ex eorum permistione actiores facti peculiare corporis liquores, quas alluunt partes vividius vellicant. His tamen, nisi cautius adhibitis, omnia in pejus rapiuntur. Sæpe enim, nimia stimulatione, spissiores sanguinis grumos ad exiguissimos usque canales protrudunt; unde febrilem actum augent, vel etiam in partibus, quibus inhaerent, tumores aut pustulas pariunt: nonnunquam verò sanguinis fluidiori parte copiosius emissâ, magis ac magis spissescit sanguis. Ex stimulantibus quædam, ut Vesicantia & Cautistica, succis insolitos exitus præbent, novasque, vasa dilacerando, moliantur excretiones. Alterantia Specificave tertiam remedium classem constituunt, quæ triplici

ratione coagulatos succos ad debitam fluiditatem reducunt. Vel eos diluunt, ut aqua gummi, oleum resinas: vel eos attenuant, ut acidi Chymicorum succi lapides comminuant: vel suo inter grumos interposito interjectuque intimæ eorum connexioni obstant, ut hydrargyrus auro permixtus ejus soliditatem ac duritiem tollit. Nec ab acidis, nec ab acribus ipforum virtus repetenda est. Nam in corpore humano sales illi, utpotè sulphuribus accuratè involuti, vix ullam actionem in se se invicem exerunt, nullumque consequuntur effectum. Qui igitur specifica medicamina morbis adhibere intendit, quemadmodum ipsi non anxîâ curâ querendum est, an calida sint vel frigida, humida vel sicca: non pariter querat, an sint simpliciter acria vel acida, salina vel oleosa: sed ad illorum in corpus humanum vires dignoscendas præsertim attendat. Multa enim, quæ inter se discrepantia videntur, easdem obtinent virtutes: dissimiles verò, quæ planè similia. Ab acidis, ab acribus volatilibus & fixis, ab amaris, febris æquè feliciter profigitur. Vis cathartica non minùs in acidis, quàm in amaris, acribus, aut oleosis reperitur. *Brassica capitata* & *Solanum furiosum* similibus principiis & eadem proportionem constare videntur: hoc interimit, nutrit illa. Quanam autem hominem lædant, quanam verò juvent, hæc diuturniori tantùm usu perdiscat Medicus. Quandoquidem ex variâ variorum succorum, sive per acria, sive per acida inspissatione, læsa sanitas idèò tantùm variis remediis restitui possit, quod ea coagulorum quâvis ratione solvendorum virtute donentur:

Ergo omnis morbus, à Coagulatione.

Domini Doctores disputaturi.

M. Petrus Jacquemier.

M. Philippus Hacquet.

M. Joannes Baptista Chomel,
à Regiâ scientiarum Aca-
demiâ.

M. Honoratus Michelet, Regiæ
Hispaniarum Archiater.

M. Josephus Pitton Tournesort,
Regiæ scientiarum Academia
socius, & in horto regio Bo-
tanices Professor.

M. Andreas Cressé.

M. Antonius le Moine.

M. Guido Crescentius Fagon,
Regi à sanctioribus Consiliis,
& Archiattrorum Comes.

M. Jacobus de Bourges.

Proponebat Parisiis STEPHANUS FRANCISCUS
GEOFFROY, Parisinus, Baccalaureus Medicus, Regiæ
scientiarum Academia Parisiensis, Regiæque Societatis Londen-
nensis, Socius. A. R. S. H. 1703.

Apud Viduam Francisci Muguet, Regis & Facultatis Medicinæ Typographi.